

FASNACHT 2000

KLOSCHTER~ RÄBE

Mir faare ins goldige Zytalter

Kuum foot z Room e hailig Joor aa,
het au Basel Grund zem Fraid haa.
Dr Paabscht duet nur e Door uffmache,
doch z Basel gits jetz goldigi Sache,
mir sin ändlig dr Naabel vo dr Wält.
mir hän jetz baide's - Gold und Gäld!

Oo wie glänzt er in dr Sunne,
unsere goldige Zschokke-Brunne!

S maint zwoor e nyydige Witzlibold,
das syygi nur Drumpeetegold
und d Figure syygen akurat,
wie vom Hagen - nur e Plaschtinat,
doch glaubet draa - mir sin ryych,
das isch Gold - das isch kai Lyych!

Oo wie glänzen in dr Morgesunne,
die gääle Schaaldaafele vor em Brunne!

Frogsch worum fäält doo d Patina?
Haissts, dr Dänggmool-Pflääger-Maa
haig ain vom Hochbauamt konsultiert
und dä het en fachlig instruiert:
Wenn er e Dänggmool welli rainige,
s Sandstrahle besser syyg - als Stainige!

Oo wie glänzt dr Brunne, drotz de fataale,
sandig-korrundig-idiotische Straale!

Hit weiss dä vo dr Dänggmoolpflääg
vo nyt me, nur d Patina syyg ewäg
und die kenn me jo wiider aanedriggse,
und seer billig iiber s Goldige wiggse.
Doch wel die Patina däät roschte,
wurd s Vergolde weniger koschte!

Oo wie glänzt in Basel d Brunne-Kunscht,
im Goldfilz- und Beziehigsdunscht!

Derby, kaa me d Bootschaft vom Brunne verstoo,
die blutte Bueben unde - wänn au uffekool!
Si rammlen und schreyen uffen am Brunne,
doch oobe hoggen e zwai vor dr Sunne,
vermuetlig zwai Blaublieter vom Daig - oder soo,
susch hätte si kai Sunnebrand bikool!

Oo wie glänze die drey Lääbesalter,
em Alte fääle goldigi Soggehalter!

S maint ain vom Baudepartemänt,
s goldig Kalb im alte Teschtamänt
haig au kai Patina ghaa oobedruff
und drum syg dr Mooses immer no muff!
Säll goldig Kalb isch scho seer lang doot,
susch wärs hit im Regierigsroot!

Oo wie goldig glänzt dr Kunschkredit,
zem Danz ums Kalb ischs nimme wyt!

Falls me dä Zschokke-Brunne jee
wiider im alte Glanz kaa gsee,
muess men en, dass er nit aafot roschte,
mit Waggs iiberzie, susch duets wiider koschte.
S gäb im Baudep schynts e goldigi Schiggse,
wo me froo wär - si wurd go Dänggmool wiggse!

Oo wie goldig wurd si glänze – Hallelujaa,
wär uff em Brunne die goldigi Barbara!

Usnamswyys ischs emool e Politiker gsii,
won als Erschte gsait het, dä Brunne isch hii!
Doch dr Daig frait sich und au d Oeri-Clic:
Ouu lueget dä goldig Brunne - c'est chic!
Das het sicher dr Verkeersverain so gmacht
wie dr Uurschrey-Furz in dr Silvesternacht!

Oo wie glänzt dr Brunne so «goldig-braun»,
und scheen wär drumummen
e «Maschen-Draht-Zaun»!

Eb dä Brunne goldig isch oder patiniert,
isch nit wichtig, Hauptsach er funktioniert,
wel, wo Wasser fliesst, au Hoffnig kaa syy
und mer faare ins goldige Zytalter yy!
Denn schiesse mer unsere Politiker-Huffe
via Mond zem Mars in Himmel uff!

Oo wie glänzt in dr Nacht so goldig dr Mars.
Dasch die 72. Zyyle - fertig - das wars!

Me goot nadyrlig an d Ladärnen-Uusstellig bim Minschter.
Si isch vom Mäntig znacht bis am Mittwoch demorge.
